

Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", broj 32/02), direktor Uprave za indirektno oporezivanje d o n o s i

U P U T S T V O **O POSTUPKU IZVOZA**

GLAVA I - OSNOVNE ODREDBE

Član 1. (Predmet)

Ovim uputstvom bliže se propisuje provedba postupka izvoza bh. robe iz carinskog područja Bosne i Hercegovine (u daljnjem tekstu: BiH), primjena izvoznih radnji i mjera trgovinske politike, a gdje je to potrebno i naplatu izvoznih dažbina.

Član 2. (Pravni osnov)

Postupak izvoza reguliran je:

- a) odredbama člana 157. i 158. Zakona o carinskoj politici Bosne i Hercegovine ("Službeni glasnik BiH", broj 57/04), (u daljnjem tekstu: Zakon) i
- b) odredbama člana 133., 134., 138., 140., 142., 143. pod B., 144. pod B., 145.B, člana 391. do 401. i člana 423. do 429. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", broj 63a/04), (u daljnjem tekstu: Odluka).

Član 3. (Definicije)

U primjeni ovog uputstva pojmovi imaju sljedeće značenje:

- a) "*izvoznik*" podrazumijeva:
 - 1) lice za čiji račun je podnesena izvozna prijava i koje je u trenutku prihvatanja te prijave vlasnik robe ili ima pravo raspolaganja robom,
 - 2) kada vlasništvo ili pravo raspolaganja robom pripadaju licu ustanovljenom izvan carinskog područja BiH prema ugovoru o izvozu, izvoznikom se smatra ugovorna strana registrirana u BiH,
- b) "*putnik*" podrazumijeva:
 - 1) svako lice koje privremeno napušta carinsko područje BiH, gdje je inače nastanjeno,
 - 2) svako lice koje nakon privremenog boravka napušta carinsko područje BiH u kojem nije inače nastanjeno,
- c) "*lični prtljag*" podrazumijeva sav prtljag koji putnik prijavljuje carinskim organima prilikom izlaska iz BiH,
- d) "*prijevozno sredstvo*" podrazumijeva bilo koje sredstvo koje se koristi za prijevoz putnika ili robe,
- e) "*izvozni carinski ured*" znači carinski ured nadležan za postupak izvoznog carinjenja, shodno članu 9. ovog uputstva,

- f) "izlazni carinski ured" znači:
- 1) u slučaju robe izvezena željeznicom, poštom, vazduhom, rijekom ili morem, carinski ured koji je nadležan za mjesto gdje je roba preuzeta prema jedinstvenom ugovoru o prijevozu do druge zemlje od strane željezničkih kompanija, poštanskih organa, avio ili brodskih kompanija,
 - 2) u slučaju izvoza robe putem cjevovoda i izvoza električne energije, carinski ured gdje je izvoznik registriran,
 - 3) u slučaju robe koja se izvozi drugim prijevoznim sredstvima ili u okolnostima koje nisu obuhvaćene alinejama 1) i 2) ove tačke, posljednji carinski ured prije nego što roba napusti carinsko područje BiH.

GLAVA II - PROVEDBA POSTUPKA TRAJNOG IZVOZA

Član 4.

(Način prijavljivanja)

Prijavljivanje robe za postupak izvoza vrši se jednom od sljedećih radnji:

- a) bez podnošenja pisane ili usmene prijave (nekom drugom radnjom),
- b) prijavom usmenim putem,
- c) podnošenjem carinske prijave u pisanom obliku ili korištenjem tehnike obrade podataka (u daljnjem tekstu: carinska prijava).

Član 5.

(Prijavljivanje bez podnošenja pisane ili usmene carinske prijave- nekom drugom radnjom)

(1) Smatra se da je prijavljena za postupak izvoza samim činom prelaska granice carinskog područja BiH i to:

- a) roba nekomercijalnog karaktera sadržana u ličnom prtljagu putnika, ako ne podliježe naplati izvoznih dažbina,
- b) prijevozna sredstva registrirana u carinskom području BiH, koja su namijenjena ponovnom uvozu,
- c) pošiljke poslate primaocu u pismu ili poštanskom paketu, a koje sadrže robe čija ukupna vrijednost ne prelazi 20 KM,
- d) domaće životinje, koje čine stoku na poljoprivrednom imanju koje je prestalo sa radom u BiH i prebacilo svoje aktivnosti u stranu zemlju, ograničene na domaće životinje po broju koji odgovara karakteru i veličini tog poljoprivrednog imanja,
- e) poljoprivredni ili stočni proizvodi dobiveni na carinskom području BiH na imanjima koja graniče sa nekom stranom zemljom a kojim, u svojstvu vlasnika ili iznajmioca, upravlja lice koje posjeduje osnovno imanje u stranoj zemlji koja graniči sa carinskim područjem BiH. Proizvodi dobiveni od domaćih životinja moraju poticati od životinja koje vode porijeklo iz određene strane zemlje ili ispunjavati zahtjeve za slobodan promet u toj zemlji. Za poljoprivredne proizvode ograničenje se odnosi na one proizvode koji nisu prošli bilo kakvu obradu osim one koja uobičajeno prati njihovu berbu ili proizvodnju, i samo za proizvode donesene u određenu stranu zemlju od strane poljoprivrednog proizvođača ili u njegovo ime,
- f) sjemena za upotrebu na imanjima lociranim u stranoj zemlji koja graniči sa carinskim područjem BiH a kojim, u svojstvu vlasnika ili iznajmioca, upravlja osoba koja posjeduje osnovno imanje u navedenom carinskom području u

samoj blizini određene strane zemlje. To se ograničava na količine sjemena potrebne u svrhu funkcioniranja imanja i samo za sjemena koja se izvoze direktno sa carinskog područja BiH od strane poljoprivrednog proizvođača ili u njegovo ime,

- g) životinjska hrana bilo koje vrste utovarena na prijevozno sredstvo koje se koristi za prijevoz životinja sa carinskog područja BiH u stranu zemlju u cilju njihovog davanja pomenutim životinjama u toku prijevoza,
- h) druga roba neznatne ekonomske vrijednosti kada to odobri carinski organ kod kojeg je roba prijavljena za izvoz (npr. između ostalog, robe navedene u članu 15., 16. i 19. Priloga Zakona).

(2) Ako se roba iz stava 1. tačka a) ovog člana koja se nalazi u putničkom prtljagu prevozi željeznicom bez pratnje putnika i prijavljuje carinskom organu bez ličnog prisustva putnika tada se koristi carinska prijava za registriranu prtljagu, podnijeta na obrascu iz Priloga 23 Odluke, shodno uslovima i ograničenjima utvrđenim tim obrascem.

Član 6.

(Postupak na osnovu usmene prijave)

(1) Prijavljivanje za postupak izvoza na osnovu usmene prijave vrši se samo u izlaznom carinskom uredu u sljedećim slučajevima:

- a) robe nekomercijalne prirode:
 - 1) sadržane u ličnom prtljagu putnika, ili
 - 2) koju šalju fizička lica,
- b) robe komercijalne prirode pod uslovom da:
 - 1) ukupna vrijednost po pošiljci i po deklarantu ne prelazi iznos od 500 KM, i
 - 2) da pošiljka nije dio redovnog niza sličnih pošiljki, i
 - 3) da robu ne prevozi samostalni prijevoznik kao dio većeg tereta,
- c) robe iz člana 5. stav 1. tačka b) do g) ovog uputstva, i
- d) druge robe neznatne ekonomske vrijednosti kada to odobri carinski organ kod kojeg je roba prijavljena za izvoz.

(2) Carinski organi mogu odlučiti da za robe iz stava (1) ovog člana ne prihvate usmenu prijavu za postupak izvoza kada lice koje carini robu postupa za račun drugog lica u svojstvu zastupnika.

Član 7.

(Ograničenje u vezi sa prijavljivanjem usmenim putem ili nekom drugom radnjom)

Prijavljivanje za izvoz usmenim putem ili nekom drugom radnjom ne primjenjuje se na robu za koju se traži povrat uvoznih dažbina ili za robu koja podliježe zabrani ili ograničenju ili nekoj drugoj mjeri.

Član 8.

(Prijavljivanje na osnovu carinske prijave)

Prijavljivanje robe za postupak izvoza podnošenjem carinske prijave vrši se:

- a) za svu bh. robu koja napušta carinsko područje BiH, a koja ne može biti prijavljena usmeno ili nekom drugom radnjom,
- b) kada carinski organi ne mogu utvrditi ili smatraju da usmeni navodi nisu tačni ili potpuni,
- c) u slučaju primjene člana 6. stav (2) ovog uputstva,
- d) za robe iz člana 5. i 6. ovog uputstva, ukoliko to traži deklarant,
- e) kada je odobren pojednostavljeni postupak prijavljivanja.

Član 9.

(Carinski ured nadležan za
prihvatanje carinske prijave)

(1) Carinska prijava za provedbu postupka izvoza podnosi se carinskom uredu koji je nadležan za nadzor nad mjestom u kojem je izvoznik registriran, ili u kojem se roba pakuje ili tovari za izvoznu otpremu.

(2) U slučaju podugovaranja izvozna prijava se može podnijeti carinskom uredu koji je nadležan za mjesto gdje je podugovarač registriran.

(3) U opravdanim slučajevima izvozna prijava se može podnijeti i drugom carinskom uredu, osim carinskog ureda navedenog u stavu (1) ovog člana, i to u slučaju:

- a) zbirnih pošiljki:
 - 1) izvozna prijava se može podnijeti onom uredu koji je nadležan za mjesto u kojem se robe prikupljaju,
 - 2) kada se robe za izvoz utovaraju na više različitih mjesta nadležan je onaj ured koji je nadležan prema mjestu zadnjeg utovara robe,
- b) kada je udaljenost ili je putni pravac na kojem se nalazi uobičajeni izvozni ured takva/takav da bi za pošiljaoca/izvoznika bilo neekonomično da koristi taj ured - izvozna prijava se podnosi u prvom usputnom carinskom uredu na putnom pravcu prema odredišnom/izlaznom uredu,
- c) kada se radi o hitnom izvozu, a uobičajeni ured izvoza je zatvoren - izvozna prijava se podnosi u prvom usputnom carinskom uredu na putnom pravcu prema odredišnom/izlaznom uredu,
- d) kada izlazni carinski ured utvrdi da postoji višak ili da je pokazana druga vrsta robe od prijavljene (član 396. stav 4., druga i treća rečenica Odluke), radi provedbe izvoznih radnji i postupaka u vezi te robe, uz predočenje dokaza o situaciji koja je u pitanju (npr. službena zabilješka ili zapisnik izlaznog carinskog ureda), izvozna prijava se može podnijeti izlaznom carinskom uredu (ako je to tehnički moguće), u protivnom carinskom uredu koji je najbliži izlaznom carinskom uredu.

(4) U slučajevima iz stava (3) tačka b) ovog člana izvoznik je, prije namjeravanog izvoza, dužan podnijeti pismeni zahtjev (u dva primjerka) za prihvatanje izvozne prijave u carinskom uredu kojem bi shodno navedenim odredbama, mogla biti podnijeta izvozna prijava, u zavisnosti koja je situacija u pitanju. Zahtjev, između ostalog, treba da sadrži opravdane razloge za korištenje drugog izvoznog ureda, a ne uobičajenog, podatke o robi koja se namjerava izvoziti i period za koji se traži odobrenje.

(5) Ukoliko carinski ured kojem je podnijet zahtjev iz stava (4) ovog člana ocijeni da su ispunjeni uslovi za njegovo prihvatanje, odluku o odobravanju zahtjeva donosi šef carinskog ureda u skraćenom postupku, u vidu zabilješke na zahtjevu (u oba primjerka), koja treba da sadrži: broj iz protokola carinskog ureda, datum odobravanja, period za koji važi odobrenje, potpis i ovjeru pečatom (npr. "odobrava se prihvatanje izvozne carinske prijave kod CI, broj: 364/05 od 15.12.2005., za period od do "). Nakon toga jedan primjerak zahtjeva zadržava u službenoj evidenciji u posebnom registratoru, a drugi vraća podnosiocu/izvozniku, kojeg izvoznik predočava pri svakom podnošenju izvozne prijave u periodu za koji je dato odobrenje.

(6) U slučajevima iz stava (3) ovog člana izvozni carinski ured kojem je podnijeta izvozna prijava dužan je, nakon provedenog postupka, kopiju te prijave dostaviti carinskom uredu nadležnom prema mjestu gdje je izvoznik registriran.

Član 10.

(Postupak kod izvoznog carinskog ureda)

(1) Prijavljivanje robe za postupak trajnog izvoza vrši se podnošenjem nadležnom izvoznom carinskom uredu izvozne carinske prijave EX 1, na obrazcu JCI i to primjerak 1, 2, i 3, popunjene u skladu sa propisima kojima je regulirano pitanje popunjavanja carinskih prijava.

(2) Uz EX 1 prijavu prilažu se dokumenti propisani u članu 125. Odluke, odnosno sva dokumenta potrebna za ispravnu primjenu propisa i stavljanje konkretne robe u postupak izvoza, kao što je, u zavisnosti od svakog konkretnog slučaja: faktura, otpremnica, specifikacija ili pak lista, tovarni list ili druga transportna dokumenta, račun za prijevoz robe, polisa osiguranja, uvjerenja inspeksijskih organa, potvrde, rješenja/dozvole nadležnih organa za robu koja podliježe pribavljanju istih, dokaz o porijeklu robe i dr.

(3) EX 1 prijava podliježe modulu selektiviteta u zavisnosti od svakog konkretnog slučaja, tj. u zavisnosti koje mjere i kontrole izvozni carinski ured smatra potrebnim radi identificiranja robe i pravilnosti provedbe postupka. Izvozni carinski ured, ako je tehnički moguće, plombira prijevozno sredstvo u kom slučaju u polje D/J unosi podatke o stavljenim plombama. Ako se istim prijevoznim sredstvom otpremaju izvozne pošiljke od više izvoznika koje se carine u različitim carinskim uredima, prijevozno sredstvo može plombirati carinski ured u kojem se izvozno carini poslednja pošiljka, a podaci o stavljenim plombama unose se u sve izvozne prijave. U tom slučaju, taj ured je obavezan provjeriti stanje svih pošiljki sa podacima iz izvoznih prijava koje se odnose na pošiljke, a u slučaju neslaganja odgovarajuće se primjenjuju odredbe člana 13. do 15. ovog uputstva.

(4) Izvozni carinski ured nakon završetka postupka po prihvaćenoj EX 1 prijavi, istu ovjerava službenim pečatom (u gornjem desnom uglu polja D/J), nakon čega zadržava primjerak 1 i 2, a primjerak 3 EX 1 prijave vraća deklarantu/zastupniku. U polju D/J EX 1 prijave, pored ostalih podataka u zavisnosti od poduzetih mjera nadzora i kontrole, mora biti upisan datum kada je roba puštena u postupak izvoza (član 4. tačka (20) Zakona).

(5) Roba puštena u postupak izvoza može istupiti iz carinskog područja BiH preko bilo kojeg odredišnog/izlaznog ureda na graničnom prijelazu otvorenom za međunarodni promet roba, osim ako se ne radi o specifičnim slučajevima, npr. ako je u pitanju roba koja povlači veći rizik prijezare ili roba za koju je od nadležnog organa određen granični prijelaz preko kojeg može istupiti iz carinskog područja BiH (npr. u dozvoli za izvoz) i slične situacije. Deklarant će u polje 29 EX 1 prijave naznačiti carinski ured na graničnom prijelazu preko kojeg će robu izvesti iz carinskog područja BiH. U slučaju kada izvozni carinski ured ne prihvati carinski ured iz polja 29 EX 1 prijave, tada taj ured, u polju D/J EX 1 prijave, navodi granični prijelaz preko kojeg roba treba istupiti iz carinskog područja BiH (npr. "istup na GP").

Član 11.

(Dokaz o porijeklu robe)

Kada izvoznik u postupku izvoza zahtijeva izdavanje dokaza o bosanskohercegovačkom porijeklu robe, primjenjuje se Protokol o definiciji pojma "proizvoda s porijeklom" i načinima administrativne saradnje (sa njegovim prilogima) iz Ugovora o slobodnoj trgovini koji je u pitanju. Kada je u pitanju izvoz robe u zemlje Evropske unije primjenjuju se odredbe člana 35. - 59. Odluke i Prilog 6, 7, 8, 9 i 10 Odluke. Izvozni carinski ured provjerava da li je dokaz

o porijeklu pravilno popunjen (u zavisnosti koji dokaz je u pitanju) i da li su ispunjeni propisani uslovi za sticanje porijekla, te poduzima sve potrebne mjere za provjeru porijekla proizvoda i drugih podataka u dokazu o porijeklu i priloženoj dokumentaciji, pri čemu u tu svrhu može zahtijevati dostavljanje bilo kojih dokaza ili provesti bilo koju provjeru.

Član 12.

(Postupak kod izlaznog carinskog ureda)

(1) Izlaznom carinskom uredu pokazuje se roba puštena za izvoz i primjerak 3 EX 1 prijave. Izlazni carinski ured provjerava carinska obilježja ako postoje, zatim ovisno o procjeni rizika provjerava da li pokazana roba odgovara robi koja je prijavljena za izvoz, te vrši nadzor njenog fizičkog istupa iz carinskog područja BiH. Fizički pregled robe, izlazni carinski ured treba obaviti svakodnevno bar za 5 pošiljki, uzimajući u obzir količinu i vrstu robe (npr. konkurentna roba) i drugo.

(2) Carinski službenik izlaznog carinskog ureda potvrđuje fizički istup robe iz carinskog područja BiH zabilješkom na poleđini primjerka 3 EX 1 prijave, koja treba da sadrži: datum i vrijeme istupa, rezultate kontrole ako je obavljena, službenu šifru carinskog službenika koji provodi postupak i vođe smjene, te njihove potpise i ovjeru službenim pečatom. Nakon toga ovjereni primjerak 3 EX 1 prijave vraća deklarantu ili licu naznačenom u polju 50 te prijave. Vraćeni ovjereni primjerak 3 EX 1 prijave pošiljalac/izvoznik treba imati u svojoj evidenciji za potrebe kontrole stvarnog istupa robe, te kontrole poreza na dodatu vrijednost ili drugih indirektnih poreza ili primjene mjera trgovinske politike.

(3) Izvozni carinski ured može da od pošiljaoca/izvoznika traži podnošenje ovjerenog primjerka 3 EX 1 prijave, kao dokaz da je roba stvarno napustila carinsko područje BiH, što nije potrebno za svaku izvoznju radnju, jer je teret dokazivanja da je roba stvarno istupila iz carinskog područja BiH na izvozniku.

(4) Način obavještavanja izvoznog carinskog ureda o istupu robe iz carinskog područja BiH od strane izlaznog carinskog ureda bit će posebno reguliran.

Član 13.

(Postupanje sa robom u izlaznom carinskom uredu u slučaju viška robe)

Ukoliko izlazni carinski ured utvrdi da postoji višak robe od one koja je prijavljena, odnosno puštena za izvoz po predočenom primjerku 3 EX 1 prijave, postupit će na sljedeći način:

- a) u pogledu robe koja je puštena za izvoz po predočenoj EX 1 prijavi postupit će shodno odredbama člana 12. stav (1) i (2) ovog uputstva,
- b) u pogledu nađenog viška robe koja nije puštena za izvoz odbit će istup takvoj robi, o čemu će sačiniti službenu zabilješku koja treba da sadrži potpune i tačne podatke o višku robe i navode o svim drugim okolnostima datog slučaja, te poduzima odgovarajuće radnje u pogledu pokretanja prekršajnog postupka u skladu sa važećim propisima. Zabilješku, pored carinskog službenika, treba da, potpisom i datumom ovjeri i pošiljalac/izvoznik (ili njegov ovlašteni prijevoznik/ili zastupnik koji je prisutan), uz izjavu da li višak robe želi izvesti ili ne, nakon čega carinski službenik jedan primjerak službene zabilješke zadržava za službenu evidenciju, jedan predaje izvozniku, a jedan dostavlja izvoznom carinskom uredu iz primjerka 3 EX1 prijave koja se odnosi na robu iz tačke a) ovog člana,
- c) ukoliko izvoznik, u slučaju iz tačke b) ovog člana, izjavi da nađeni višak robe ne želi izvesti, izlazni carinski ured istu stavlja na raspolaganje izvozniku radi vraćanja u njegove prostorije ili na drugo mjesto u BiH,

- d) ukoliko izvoznik, u slučaju iz tačke b) ovog člana, izjavi da nađeni višak robe želi izvesti, ta roba ostaje pod carinskim nadzorom izlaznog carinskog ureda sve dok izvoznik za istu, u roku određenom od tog ureda (koji se unosi u službenu zabilješku iz tačke (b) ovog člana), kod nadležnog izvoznog ureda (vidi član 9. stav 3. tačka d) ovog uputstva), ne završi izvozne radnje i ne predoči primjerak 3 EX 1 prijave, u vezi koje se dalje postupa na uobičajeni način. Ukoliko, po isteku tog roka, nisu završene izvozne formalnosti izlazni carinski ured robu stavlja na raspolaganje izvozniku.

Član 14.

(Postupanje sa robom u izlaznom carinskom uredu u slučaju manjka robe)

Ukoliko izlazni carinski ured utvrdi da postoji manjak robe od one koja je prijavljena za izvoz, odnosno puštena za izvoz po predočenom primjerku 3 EX 1 prijave, postupit će na sljedeći način:

- a) u pogledu predočene robe, u zabilješci na poleđini primjerka 3 EX 1 prijave, pored ostalog, konstatuje stvarno nađeno stanje o robi i dozvoljava istup te robe, te poduzima radnje u pogledu pokretanja prekršajnog postupka u skladu sa važećim propisima,
- b) ovjereni primjerak 3 EX 1 prijave iz tačke a) ovog člana ne vraća pošiljaocu/izvozniku, nego isti službeno dostavlja izvoznom carinskom uredu, koji ured poduzima propisane radnje i mjere potrebne za izmjenu te prijave radi njenog usklađivanja sa stvarnim stanjem robe koja je, po nalazu (zabilješci) izlaznog carinskog ureda, istupila iz carinskog područja područja BiH.

Član 15.

(Postupanje sa robom u izlaznom carinskom uredu u slučaju pokazivanja druge vrste robe)

Ukoliko izlazni carinski ured utvrdi da je pokazana druga vrsta robe od one koja je prijavljena za izvoz, odnosno puštena za izvoz po predočenom primjerku 3 EX 1 prijave, primjenit će uz potrebne izmjene (*mutatis mutandis*) odredbe člana 13. tačka b), c) i d), a predočeni primjerak 3 EX 1 prijave, zajedno sa službenom zabilješkom, dostavit će službeno izvoznom carinskom uredu, koji ured poduzima propisane radnje i mjere potrebne za poništenje te prijave, koje poništenje se treba provesti i u carinskoj evidenciji (kontrolnici EX prijava).

Član 16.

(Postupanje u slučaju kad roba nije izvezena)

Ukoliko roba puštena u postupak izvoza od izvoznog carinskog ureda ne napusti carinsko područje BiH izvoznik je dužan da o tome odmah obavijesti izvozni carinski ured i vrati mu primjerak 3 EX 1 prijave i sva dokumenta koja mu je izvozni carinski ured predao nakon prihvatanja prijave, uključujući i EUR 1 ako je izdat. Izvozni carinski ured u pogledu vraćenog primjerka 3 EX 1 prijave poduzima propisane radnje i mjere potrebne za poništenje iste, koje poništenje se treba provesti i na primjerku 1 prijave, kao i u carinskoj evidenciji (kontrolnici EX prijava).

Član 17.

(Naknadno podnošenje izvozne prijave)

(1) Ukoliko roba napusti carinsko područje BiH bez EX 1 prijave izvoznik takvu prijavu naknadno podnosi carinskom uredu koji je nadležan prema mjestu njegove registracije.

(2) Da bi nadležni carinski ured prihvatio prijavu iz stava (1) ovog člana izvoznik mora priložiti zadovoljavajuće dokaze koji se odnose na vrstu i količinu dotične robe (npr. carinska prijava o uvozu u zemlju uvoznicu ili službena izjava od nadležnog organa zemlje uvoznice na temelju koje se može utvrditi istovjetnost robe) i okolnosti pod kojima je roba napustila carinsko područje BiH. Taj carinski ured na primjerku 3 EX 1 prijave stavlja zabilješku navedenu u članu 12. stav (2) ovog uputstva.

Član 18.

(Pojednostavljeni postupak prijavljivanja)

Prijavljivanje robe za postupak izvoza može se izvršiti i podnošenjem nepotpune prijave, ili pojednostavljene prijave ili na osnovu lokalnog carinjenja, u skladu sa odredbama člana 189. - 196. Odluke i drugim propisima o pojednostavljenim postupcima.

GLAVA III - POSEBNI POSTUPCI

Član 19.

(Postupak izvoza u željezničkom i vazdušnom prometu)

(1) Ako se roba puštena za postupak izvoza iz carinskog područja BiH prevozi željeznicom ili vazduhoplovom, u tom slučaju kao izlazni carinski ured postupa ured iz člana 3. tačka f) alineja 1) ovog uputstva.

(2) Izvozni i izlazni carinski ured u provedbi radnji iz svoje nadležnosti u vezi postupka izvoza za robu koja se prevozi željeznicom ili vazduhoplovom postupaju na način određen propisima i ovim uputstvom, s tim da carinski službenik izlaznog carinskog ureda na primjerak prijevozne isprave stavlja naznaku "Izvoz" crvene boje i službeni pečat. U slučaju direktnog prijevoza ili letova ka odredištima u drugim zemljama navedena naznaka na prijevoznoj ispravi nije potrebna, ukoliko prijevoznik drugim sredstvima može da garantuje regularnost postupka.

Član 20.

(Postupak izvoza u poštanskom prometu)

(1) U slučaju prijavljivanja pošiljki pismom i paketom u poštanskom prometu za izvozno carinjenje smatra se da su prijavljene carini u trenutku prihvatanja od strane poštanskih organa, a deklarantom se smatra pošiljalac pošiljke, a kada je to primjenljivo i dužnikom.

(2) Ako roba iz stava (1) ovog člana ne podliježe obavezi plaćanja izvoznih dažbina smatra se da je postupak izvoza odobren u trenutku prihvatanja pošiljke od strane poštanskih organa.

(3) Stav (1) i (2) ovog člana ne primjenjuje se u slučaju:

- a) pošiljki koje sadrže robu za komercijalne svrhe, a čija vrijednost prelazi 500 KM,
- b) pošiljke koje sadrže robu za komercijalne svrhe, a koje čine dio redovnog niza sličnih radnji,
- c) kad se carinska prijava podnosi u pisanom obliku, usmenim putem ili korištenjem tehnike obrade podataka,

d) roba u vezi s kojom se traži povrat uvoznih dažbina, odnosno roba koja podliježe zabrani ili ograničenju ili nekoj drugoj mjeri.

(4) Roba iz stava (3) tačka a), b) i d) ovog člana se prijavljuje za postupak izvoza izvoznom carinskom uredu nadležnom za poštu carinjenja podnošenjem EX 1 prijave, po kojoj se provodi postupak na način određen propisima i ovim uputstvom.

(5) Poštanske pošiljke koje u inostranstvo šalju fizička lica mogu se predati svakoj pošti (prijemna pošta), koje prijemna pošta otprema nadležnoj pošti carinjenja radi provedbe carinskog postupka izvoza podnošenjem CN 22 prijave za pisma, odnosno CN 23 za pakete. Poštanske pošiljke koje podliježu carinskom pregledu, pošta carinjenja stavlja na uvid carinskom uredu koji obavlja carinski pregled.

(6) Prijavljivanje poštanskih pošiljki za carinski postupak izvoza, koje u inostranstvo šalju pravna lica, vrši se podnošenjem EX 1 prijave po kojoj se postupak provodi na način određen propisima i ovim uputstvom.

Član 21.

(Postupak izvoza cjevovodima i električnim vodovima)

Postupak izvoza robe koja se transportuje putem cjevovoda ili električnih vodova prijavljuje se podnošenjem EX 1 prijave carinskom uredu nadležnom prema mjestu sjedišta izvoznika. Ovaj ured je ujedno i izlazni carinski ured.

GLAVA IV - PRIVREMENI IZVOZ ROBE NAMIJENJENE VRAĆANJU U NEPROMIJENJENOM STANJU

Član 22.

(Prijavljivanje bh. robe za privremeni izvoz)

(1) Izvoz bh. robe iz carinskog područja BiH s namjerom njenog naknadnog vraćanja u nepromijenjenom stanju, (izvoz radi izlaganja na sajmovima, izložbama, manifestacijama, izvođenje radova u inostranstvu i druge transakcije bez promjene vlasništva), vrši se podnošenjem izvozne EX 2 prijave.

(2) EX 2 prijava se podnosi nadležnom izvoznom carinskom uredu iz člana 9. ovog uputstva, uz koju se prilažu dokumenta potrebna za identificiranje robe i ostala dokumenta potrebna za primjenu propisa i stavljanje konkretne robe u zahtijevani postupak, kao i izjava deklaranta o namjeni izvoza.

Član 23.

(Postupanje po prijavi za privremeni izvoz)

(1) EX 2 prijava iz člana 22. ovog uputstva popunjava se shodno propisima kojima je regulirano pitanje popunjavanja carinskih prijava, a putem modula selektiviteta u informacionom sistemu, upućuje se na crvenu traku (potpuna kontrola robe i dokumenata).

(2) Shodno propisima iz stava (1) ovog člana, u prvu potpodjelu polja 1 EX 2 prijave upisuje se oznaka "EX", a u drugu potpodjelu tog polja šifra "2" koja označava privremeni izvoz. U polju 37 EX 2 prijave upisuje se šifra postupka "2300" koja označava privremeni izvoz robe za vraćanje u nepromijenjenom stanju bez prethodnog postupka, a u polje 24 upisuje se šifra iz priloga 20 Odluke za vrstu transakcije koja zaista odgovara komercijalnom sadržaju posla prijavljenog konkretnom EX 2 prijavom.

(3) Podaci u EX 2 prijavi i pratećim dokumentima moraju da osiguraju utvrđivanje istovjetnosti robe kako u postupku privremenog izvoza, tako i u postupku njenog ponovnog uvoza.

(4) Prihvatanje EX 2 prijave od strane izvoznog carinskog ureda smatra se odobrenjem postupka privremenog izvoza.

(5) Izlazni carinski ured će po okončanju izvoznih radnji za datu robu, na zahtjev deklaranta, izdati jedan ili više Listova s podacima INF 3 na obrascu iz Priloga 52. Odluke, a u skladu sa članom 423. do 429. Odluke.

Član 24.

(Privremeni izvoz u postupku vanjske obrade)

U provedbi privremenog izvoza prema postupku vanjske obrade odgovarajuće se primjenjuje ovo uputstvo, uz primjenu pravila i specifičnosti za taj postupak propisanih propisima o postupku vanjske obrade i drugim važećim propisima.

GLAVA VI - PONOJNI IZVOZ

Član 25.

(Postupak ponovnog izvoza)

(1) Ponovni izvoz je carinski odobreno postupanje ili upotreba za robu koja nije bh. roba, a koja je uvezena u okviru carinskog postupka unutrašnje obrade, privremenog uvoza i carinskog skladištenja.

(2) U provedbi ponovnog izvoza odgovarajuće se primjenjuje ovo uputstvo i drugi važeći propisi, uz sljedeće specifičnosti:

- a) roba koja nije bh. roba može, po zahtjevu deklaranta, biti ponovo izvezena iz carinskog područja BiH bilo po postupku izvoza, u kom slučaju se podnosi izvozna EX 3 prijava, ili po "zajedničkom izvoznom i provoznom postupku" uz podnošenje carinskih prijava za taj postupak u skladu sa propisima kojima je regulirano pitanje popunjavanja carinskih prijava,
- b) pored navedenog, primjenjuju se i druge specifičnosti kod ponovnog izvoza propisane odredbama carinskih propisa i drugih propisa o postupcima iz stava (1) ovog člana.

Član 26.

(Pojednostavljeni postupci za ponovni izvoz)

(1) Pojednostavljeni postupci za ponovni izvoz robe kojim se razdužuje prethodni carinski postupak unutrašnje obrade, privremenog uvoza i carinskog skladištenja mogu se odobriti i koristiti na način propisan odredbama člana 187. Odluke i drugih propisa o pojednostavljenim postupcima.

GLAVA VII - PONIŠTENJE IZVOZNE CARINSKE PRIJAVE

Član 27.

(Situacije u kojima nije obavljen izvoz robe)

U pogledu poništenja izvoznih carinskih prijava mogu se razlikovati dvije situacije:

- a) kada je pošiljalac/izvoznik, u skladu sa članom 158. stav 1. tačka e) pod i. i ii. i članom 399. Odluke, sam obavijestio izvozni carinski ured koji je prihvatio carinsku prijavu za izvoz o tome da roba nije napustila carinsko područje BiH, te vratio primjerak 3 izvozne prijave sa svim drugim dokumentima koje mu je taj ured predao nakon prihvatanja izvozne prijave,
- b) kada se u slučajevima iz tačke a) ovog člana i u drugim slučajevima, kontrolom ili na drugi način utvrdi da roba puštena za izvoz nije izvezena, a pošiljalac/izvoznik nije postupio u skladu sa 399. Odluke, tj. nije sam obavijestio izvozni carinski ured da roba nije izvezena.

Član 28.

(Postupak poništenja od strane izvoznog carinskog ureda)

(1) Rješenje o poništenju u slučajevima iz člana 27. tačka a) ovog uputstva donosi šef izvoznog carinskog ureda i dostavlja ga i pošiljaocu/izvozniku. Ogledni primjer rješenja dat je u prilogu ovog uputstva.

(2) Nakon dostave rješenja o poništenju, izvozni carinski ured će na samoj izvoznj prijavu staviti zabilješku o njenom poništenju, na način da u polje E izvozne prijave unese razloge i pravni osnov za poništenje, a na izvoznj prijavu, kosom linijom i velikim štampanim slovima unese naznaku: "PONIŠTENO". Nakon toga će poništiti izvoznj prijavu i u carinskoj evidenciji, čime se završava postupak u vezi s poništenjem izvozne prijave.

Član 29.

(Postupak poništenja u drugim slučajevima)

U pogledu postupka poništenja izvozne prijave u slučajevima iz člana 27. tačka b) ovog uputstva postupit će se na način predviđen odredbama člana 30. - 34. ovog uputstva.

Član 30.

(Dokazivanje pravilnog završetka postupka izvoza)

(1) Kada u kontroli od strane kontrolnog carinskog organa, pošiljalac/izvoznik ne može dokazati da je roba istupila iz carinskog područja BiH, kontrolni organ će pozvati pošiljaoca/izvoznika da dostavi dokaze da je roba stvarno napustila carinsko područje BiH. U pozivu će biti naveden rok za dostavljanje traženih dokaza, ne kraći od mjesec dana, a na zahtjev pošiljaoca/izvoznika može se i produžiti.

(2) Kad pošiljalac/izvoznik na poziv iz stava (1) ovog uputstva podnese dokaze, organ koji je tražio dokaze će podnesene dokaze, zajedno s primjerkom 1 izvozne carinske prijave, dostaviti službi nadležnoj za vođenje prvostepenog carinsko-upravnog postupka u regionalnom centru kojem organizaciono pripada izvozni carinski ured koji je prihvatio predmetnu izvoznj prijavu (u daljnjem tekstu: regionalni centar).

(3) U svrhe dokazivanja pravilnog završetka postupka izvoza, tj. da je roba stvarno istupila iz carinskog područja BiH, može se priložiti original carinska isprava zemlje uvoznice ili njena kopija ovjerena od carinskih organa zemlje uvoznice ili dokumenat izdat od drugog organa (npr. od konzuranog predstavništva BiH u zemlji uvoznici). Navedeni dokumenti se mogu prihvatiti pod uslovom da sadrže podatke iz kojih se nesumnjivo može utvrditi

istovjetnost robe, tj. koji omogućavaju provjeru da je roba koja je puštena u postupak izvoza ista kao roba navedena u tim dokumentima.

Član 31.

(Razmatranje dokaza o pravilnom završetku postupka izvoza)

(1) Kada regionalni centar, nakon razmatranja dokaza koje je podnio pošiljalac/izvoznik, nesumnjivo utvrdi da je roba puštena u postupak izvoza stvarno napustila carinsko područje BiH, o tome će sastaviti službenu zabilješku, tako što će u polje E izvozne prijave unijeti zabilješku: "Uvidom u priložene isprave (navesti sve podatke o ispravama, naziv zemlje i organa koji ih je izdao, broj i datum) je utvrđeno da je roba napustila BiH", koja će potom biti potpisana i ovjerena.

(2) Nakon stavljanja službene zabilješke, regionalni centar će izvoznom carinskom uredu dostaviti izvoznu prijavu, zajedno sa svima podnesenim ispravama, te pismeno obavijestiti pošiljaoca/izvoznika o prihvatanju podnesenih dokaza. Uz obavijest pošiljaocu/izvozniku će biti dostavljena i kopija izvozne prijave s unesenom zabilješkom iz stava (1) ovog člana.

(3) Ako regionalni centar, na temelju podnijetih dokaza, ne može utvrditi da je roba napustila carinsko područje BiH (ili istovjetnost robe), po službenoj dužnosti, donijet će rješenje o neprihvatanju podnesenih dokaza i utvrđivanju da predmetni izvozni postupak nije pravilno završen, kojim će odlučiti i o poništenju izvozne prijave na osnovu člana 8. stav 1. Zakona. Ako je po poništenju prijavi bilo izdato i uvjerenje o kretanju EUR. 1 o bosanskohercegovačkom porijeklu isti će u tom postupku biti poništen, što se naznačava i na kopiji koja ostaje uz izvoznu prijavu, a od pošiljaoca/izvoznika će zatražiti da vrati original. Ukoliko pošiljalac/izvoznik ne vrati original uvjerenja o kretanju EUR.1, o tome se obavještava Sektor za carine Uprave za indirektno oporezivanje, koji će potom obavijestiti Sektor za poreze, kao i na pogodan način zemlju uvoznicu navedenu u EUR. 1.

Član 32.

(Postupanje u slučaju nedostavljanja dokaza)

(1) Kada na poziv kontrolnog carinskog organa pošiljalac/izvoznik ne podnese dokaze o istupu robe iz BiH ili ih ne dostavi u roku iz člana 30. stav (1) ovog uputstva, izvozna prijava po kojoj je roba puštena u postupak izvoza ostaje nerazdužena, u kom slučaju taj organ dostavlja predmet regionalnom centru radi odlučivanja o poništenju izvozne prijave.

(2) Nakon dostave rješenja o poništenju izvozne prijave pošiljaocu/izvozniku u slučajevima iz člana 31. stav (3) ovog uputstva i stava (1) ovog člana, odnosno kada rješenje o poništenju postane konačno, regionalni centar će u izvoznu prijavu staviti zabilješku o njenom poništenju, tako što će u polju E prijave navesti razloge i pravni osnov za poništenje, a na prijavi, kosom crtom i velikim štampanim slovima, unijeti oznaku: "PONIŠTENO" i istu, zajedno sa rješenjem dostaviti izvoznom carinskom uredu. Nakon toga izvozni carinski ured će poništiti prijavu u carinskoj evidenciji, čime se završava postupak poništenja izvozne prijave.

Član 33.

(Obavijest drugim organima)

(1) U svim slučajevima poništenja izvozne prijave i uvjerenja o kretanju EUR. 1, regionalni centar je u obavezi rješenje o poništenju dostaviti i Sektoru za carine, koji će potom obavijestiti Sektor za poreze, radi utvrđivanja eventualne porezne obaveze.

(2) Nakon poništenja izvozne prijave, otpis količina po potvdama ili drugim ispravama koje su bile priložene uz izvoznju prijavu se vraćaju u prvobitno stanje.

(3) Regionalni centar će, također, ako je roba prijavljena za izvoz bila predmet posebnih trgovinskih mjera (režim dozvole i sl.), rešenje o poništenju dostaviti i drugim nadležnim organima.

Član 34.

(Kontrole u drugim situacijama)

(1) Odredbe člana 27. do 33. ovog uputstva se primjenjuju i u slučajevima kada se kontrola istupa robe iz carinskog područja BiH obavlja na temelju člana 396. stav 7. Odluke.

(2) Odredbe ovog uputstva ne isključuju kontrole izvoza kod poreznih obveznika od strane Sektora za poreze. Ukoliko taj Sektor u kontroli nađe da roba nije istupila iz carinskog područja BiH ili da postoje druge povrede pravila postupka izvoza, o tome će obavijestiti Odsjek za kontrolu u Sektoru za carine, radi poduzimanja odgovarajućih mjera i radnji u cilju reguliranja nastale situacije.

GLAVA VIII - ZAVRŠNE ODREDBE

Član 35.

(Stupanje na snagu)

Ovo uputstvo stupa na snagu osmog dana od dana objavljivanja u "Službenom glasniku Bosne i Hercegovine", a bit će objavljeno i na WEB stranici Uprave za indirektno oporezivanje.

Član 36.

(Prestanak važenja ranijih propisa)

Danom stupanja na snagu ovog uputstva prestaju da važe svi akti bivših carinskih uprava entiteta i Uprave za indirektno oporezivanje, kojima su regulirana pitanja koja su predmet ovog uputstva.

Broj: 02-3577/06
Datum, 26.06.2006. godine

DIREKTOR
Kemal Čaušević

Broj: _____
Datum, _____

Regionalni centar _____, Carinska ispostava _____, rješavajući po službenoj dužnosti, na osnovu člana 20. stav (3) i člana 22. stav (19 tačka f) Zakona o Upravi za indirektno oporezivanje ("Sl. glasnik BiH", broj 89/05), d o n o s i

R J E Š E N J E
o poništenju izvozne carinske prijave

1. Poništava se izvozna carinska prijava EX ..., broj od godine, Carinske ispostave
2. Žalba ne odlaže izvršenje rješenja.

O b r a z l o ž e n j e

Pošiljalac/izvoznik

.....
dana....., podnio je Carinskoj ispostavi izvozna carinsku prijavu EX, kojom je za izvozni postupak bila prijavljena roba -
..... Uz prijavu je priložio sljedeća dokumenta:

Carinska ispostava prihvatila je izvozna carinsku prijavu pod brojem od godine, te robu stavila u postupak izvoza.

Roba koja je stavljena u postupak izvoza, mora napustiti carinsko područje BiH. Ukoliko roba nije napustila carinsko područje BiH, izvoznik je dužan, u skladu sa članom 399. stav 1. Odluke o provedbenim propisima Zakona o carinskoj politici Bosne i Hercegovine ("Sl. glasnik BiH", broj 63a/04), obavijestiti izvozni carinski ured kod kojeg je podnijeta izvozna carinska prijava, da roba nije bila stvarno izvezena, te vratiti primjerak 3 izvozne prijave.

U konkretnom slučaju pošiljalac/izvoznik je postupio na način kako je to propisano, te je, na temelju člana 158. stav 1. tačka e) pod i. ili ii. prednje citirane Odluke, donijeto rješenje kao u dispozitivu.

Kao u tački 2. dispozitiva ovog rješenja odlučeno je na osnovu člana 7. Zakona o carinskoj politici Bosne i Hercegovine ("Sl. glasnik BiH", broj 57/04).

Pouka o pravnom lijeku: Protiv ovog rješenja može se uložiti žalba Središnjem uredu Uprave za indirektno oporezivanje u Banjoj Luci, u roku od 15 dana od dana prijema ovog rješenja. Žalba se predaje ovoj Carinskoj ispostavi neposredno ili putem pošte, taksirana sa administrativnom taksom u iznosu od KM, prema tarifnom broju Tarife uz Zakon o administrativnim taksama ("Sl. glasnik BiH", broj).

Dostavljeno:

1. Pošiljaocu/izvozniku
2. Uz EX, broj od
3. a/a

Šef carinske ispostave

.....